

Jammu Herbal Garden

केन्द्रीय आयुष मंत्रालय दे तैहत राष्ट्रीय औशधी बूहटे सरबन्धी राष्ट्रीय बोर्ड नै 53 लक्ख रुपें दी फंडिंग कन्नै जम्मू खिते च 100 स्कूल हर्बल गार्डन स्थापित करने दी मंजूरी देई दिती ऐ। जम्मू-कश्मीर दे आयुष निदेशालय आसेया सिफारिश कीती गेदी इस परियोजना दा मकसद विद्यार्थियें च औशधी बूहटें दे बारे च जागरुकता ते संरक्षण गी बढ़ावा देना ऐ। इस योजना तैहत हरेक जिले दे 10 स्कूल शामिल कीते जागंन। एह स्कूल औशधी बूहटें दी पंछान- इंदी रड़ ते इस्तेमाल आस्तै सिखने दे थाहर दे रुप च कम्म करगंन। आयुष दे निदेशक डाक्टर अजय कुमार टिक्कू होरें आखेआ ऐ जे इस पैहलकदमी कन्नै तर्जुबें आहली शिक्षा- पर्यावरण सरबन्धी जिम्मेदारी ते रिवायती सेहत प्रणालियें दी समझ च बाददा होग।



Jammu Airport

सिविल हवाबाजी सरबन्धि केन्द्री मंत्री राम मोहन नायडू होरें कल वर्चुचएल ढंगै नै 6 यात्री केन्द्रित पैहलकदमियें ते केंई ब्हाई अड्डे दा दर्जा बधाने दे कम्म दे उदघाटन कीता जिंदे च श्रीनगर ते जम्मू ब्हाई अड्डा बी शामिल ऐ। इनें नमियें सुविधाएं च विजन कागज दा इस्तमाल कीते दे चेहरे दी पंछान कन्नै डिजी यात्रा सेवां- वाजब भाएं पर खाने- पीने दी सुविधा आहला उडान कैफे मुफ्त वाई फाई ते ब्हाई अड्डे पर बच्चें दे खेड्डने लेई थाहर- यात्रियें गी सफर दौरान पढ़ने दा शानदार अनुभव देने आहली फ्लाईब्रेरी ते मकामी कारीगिरें लेई थाहर “अवसर” शामिल ऐ। इस पैहल दा मकसद यात्रियें दी सुविधा दा पूरा ख्याल रखदे होई उनें गी ब्हाई यात्रा दा इक नूठा अनुभव देना ऐ। ब्हाई अड्डे दे निदेशक देवेन्दर यादव होरें आखेआ कि इनें

सुविधाएं दा जोड़ेया जाना- सिविल ब्हाबाजी मंत्रालय ते भारतीय ब्हाई अड्डा प्राधिकरण आसेया ब्हाई अड्डे दे आधुनिकीकरण गितै कीते जा'रदे जतनें दा गै हिस्सा ऐ।



JKLA Private Bills

जम्मू-कश्मीर विधान सभा च अज्ज कुल 33 प्राइवेट मिम्बर बिल सदन च पेश कीते जाने दा कार्यक्रम ऐ- जिंदे च शराब दी बिक्री दे इस्तमाल पर रोक दा प्रस्ताव ते सरकारी डाक्टरें दी प्राइवेट प्रेक्टिस पर रोक लाना बी शामिल ऐ। एहदे इलावा केन्द्री शासत प्रदेश च कश्मीरी हिंदु मंदरें दे प्रबंधन सुरक्षा ते संचालन दे कन्नो-कन्नी बेरोजगार नौजवानें दी समाजी सुरक्षा सरबंधि बिल बी शामिल न। तौंआई मुख्मन्त्री उमर अब्दुल्ला हुंदे आसेया 2022-23 बरे दी कैग रपोर्टे ते 2024-25 बरे दे माली खातें ते पैहे कढाने ते खर्चने सरबंधी प्रस्ताव बी अज्ज सदन च रखे जाने न।



MoS –PM Ranji

केन्द्री मन्त्री डाक्टर जितेन्द्र सिंह होरें जम्मू-कश्मीर क्रिकेट टीम दे रणजी ट्रॉफी जितने दे ऐतिहासिक मौके पर टीम गी बधाई देने पर प्रधानमन्त्री नरेन्द्र मोदी हुंदा आभार प्रगट कीता ऐ। अपने इक “एक्स” संदेश च डाक्टर जितेन्द्र सिंह होरें आखेआ कि प्रधानमन्त्री हुंदे आसेया “मन की बात” कार्यक्रम च जम्मू-कश्मीर दी क्रिकेट टीम दी इक ऐतिहासिक उपलब्धि दा जिक्र कीते जाने कन्नै पूरे केन्द्र शासत प्रदेश दे लोकें टकोहदा करियै नौजवानें ते खेड्ड प्रेमियें दा होसला

बधोग ते खेडङ् संस्कृति गी बी बढावा थहोग। मोदी होंरे कल “मन की बात” कार्यक्रम दी 132 मीं किशत च जम्मू-कश्मीर क्रिकेट टीम दे कप्तान पारस डोगरा ते तेज गेंदबाज आकिब नबी दा बी जिक्र कीता- जिन्नै रणजी ट्राफी दे इस संस्करण च 60 विकटां लैतियां।

<><><><><><>

Dar Tulip Garden

राई-बाई मंत्री जावेद अहमद डार होंरे अनंतनाग च MCRS, सागम च इक ट्यूलिप गार्डन दा उदघाटन कीता- जेदे कन्नै फुल्लें दी रङ् कन्नै जुड़े दे ग्रामीण विकास गी बढावा दिता जाई सकै। SKUAST-Kashmir आसेया विकसित इस सुविधा दा मकसद आजीविका ते सैलसफा गी बढावा देना ऐ। दौरे दौरान मंत्री होंरे ट्यूलिप बेड दा व्यापक निरीक्षण कीता ते केन्द्र च चला'रदी फुल्लें दी रङ् ते अनुसंधान सरबंधी गतिविधियें दा जायजा लैता। इस मौके पर बोलदे होई उ'नें नवाचार ते करसानें तगर पुज्ज बनाने दी भूमिका पर लौ's पाई ते बाहरा नोआए गेदे ट्यूलप बल्ब बारै इक कार्यशाला बी लोआई, जेहदे च टिकाऊ राई-बाई पर ध्यान केन्द्रित कीता गेआ। इस मौके पर अग्गे बोलदे होई मंत्री होंरे आखेआ।

<><><><><><>

ते हुंन बाकि दिएं खबरें कन्नै कुणाल श्रीवत्स:-

<><><><><><>

LG- Delegation

कल जम्मू च कैई शिष्टमंडलें उपराज्यपाल मनोज सिन्हा होरें गी जाइयै मिले ते आम लोकें दी भलाई-बेहतरी ते विकास सरबंधि मुद्दें उन्दे सामने रखे। गुड़ा सलाथिया थमां नौजवानें दे विकास गितै मार्ग-दर्शन ते परामर्श इकाई दा इक प्रतिनिधिमंडल ते जम्मू-कश्मीर कांग्रेस राजीव गांधी पंचैती राज संगठन दे चेरयरमैन बी उनें गी जाइयै मिले। आर.एस.पुरा थमां रशपाल सिंह हुंदी अगुआई च साबका सरपंचें दे इक शिष्टमंडल दे इलावा शोपिया थमां सिविल समाज दे प्रतिनिधिं दा इक दल बी एल.जी होरें गी मिलेआ ते इलाके दे मुद्दें उन्दे कन्नै सांझे कीते। एल.जी होरें सब्बनं दियें दिक्कतें-परेशानियें ते मंगें गी धरोइयै सुनेया ते उन्दे पैहल दी बिनाह पर नबेड़े दा यकीन दोआया।

<><><><><><>

Div. Com Appeal

जम्मू दे डिवीजनल कमीशनर रमेश कुमार होरें लोकें गी अपील कीती ऐ जे ओह ईंधन दी उपलब्धता बारे अफवाहें दा शिकार नैई होन। उनें भरोसा दोआया ऐ जे सप्लाई सामान्य बनी दी ऐ ते कुसै चाली दी कोई कमी नैई ऐ। उनें अगग लग्गने दे गंभीर खतरे दा हवाला दिंदे होई लोकें गी सलाह दिती जे ओह पेट्रोल जां डीजल गी बोतले जां ढिले डब्बे च नैई रखन। डिवीजनल कमीशनर होरें उपभोक्ताएं गी अपील कीती जे ओह छड़ा सरकारी जानकारी पर गै निर्भर रौहन ते आम तौरा पर इस्तेमाल दे तौर-तरीकें गी बनाई रखन। अधिकारियें इक बारी फही दोहराया ऐ जे लोड़चदी मात्रा च ईंधन भंडार उपलब्ध ऐ ते पूरे इलाके च घबराहट च ईंधन खरीदने जां जमाखोरी करने दी कोई लोड़ नैई ऐ।

<><><><><><>

Satish Sports

खेड्ढ मंत्री सतीश शर्मा होंरें आखेआ ऐ जे नौजवान समाज दी रीढ न ते उन्दी ऊर्जा गी सकारात्मक तरीके कन्नै इस्तेमाल करने च खेड्डें दी महत्वपूर्ण भूमिका ऐ। मैडा मांदरियां च सलाना खेड्ड कार्यक्रम गी सम्बोधित करदे होई उ'नें ग्राएं थमां लेइयै राश्ट्री स्तर तगर इक मजबूत खेड्ड ढांचा बनाने लेई सरकार दी वचनबद्धता गी फही पक्का कीता। इस मौके पर बोलदे होई उ'नें खेड्डें दे बुनियादी ढांचे दा विस्तार करने ते उब्भर दी प्रतिभाएं गी समर्थन देने लेई युवा कार्यक्रम गी मजबूत करने दी जरूरतै पर जोर पाया। मंत्री होंरें विद्यार्थियों गी शारीरिक गतिवधि दे कन्नो-कन्नी पढ़ाई च संतुलन बनाने दा बी आग्रह कीता।



DIC Ramban

जिला उद्योग ते बपार केन्द्र रामबन आसेआ हाल च गै बटोत च उद्यमता विकास ते छमता निर्माण दे बारे च इक कार्जशाला दा सरिस्ता कीता गेआ- जेहदा मकसद नौजवानें ते विद्यार्थियों गी कम्म-रोजगार लेई उद्यम विकास दियें संभावनाएं बारे जागरुक करना हा। इस दौरान उनें'गी "उद्यम" पोर्टल पर नां दर्ज कराने ते प्रधानमंत्री रोजगार सृजन कार्यक्रम पी.एम विश्वकर्मा ते लौहके दरमयाने ते भलेआ लौहके उद्यमें दी कारकरदगी च बेहतरी आहन्ने सरबंधि कार्यक्रम R.A.M.P बारे जानकारी दिती गई। नौजवानें गी उद्योग ते बपार विभाग दियें स्कीमें दे बारे च बी जानकारी दिती गई- जिंदा फैयदा चुक्कियै नौजवान अपना कम्म रोजगार शुरु करी सकदे न। इस बारे होर जानकारी देआ'रदे न जिला उद्योग केन्द्र दे जनरल मैनेजर रविन्दर कुमार.